




ԷԿՈՒՄԵՆԻԿ

ԿՅԱՆՔ

«ԵՎՐՈՊԱԿԱՆ ԵԿԵՂԵՑԻՆԵՐԻ ԿՈՆՖԵՐԱՆՍ»-Ի
ՈՒՍՈՒՄՆԱՍԻՐԱԿԱՆ ԽՈՐՀՐԴԱԿՑՈՒԹՅՈՒՆԸ
ԳԱԼՆՈՅԿԻՐԽԵՆՈՒՄ

1977 թվականի մարտի 7—11-ը Գալնուկիրխենում (Ավստրիա) տեղի է ունեցել «Եվրոպական եկեղեցիների կոնֆերանս»-ի կողմից կազմակերպված ուսումնասիրական մի խորհրդակցություն՝ քրիստոնեական եկեղեցիները և ընդհանուր աշխարհը հուզող քաղաքական, ռազմական, տնտեսական, տեխնիկական, մշակութային և մարդկային իրավունքի հարցերի շուրջ: Խորհրդակցության նպատակն է եղել՝ մասնավորապես քննարկել Հելսինկիի համաձայնագրի հետևանքներն ու պարտավորությունները Եվրոպայի և զարգացող երկրների հարաբերությունների նկատմամբ:

19 երկրներից և 40 եկեղեցիներից շուրջ 70 ներկայացուցիչներ, մեծ մասամբ աշխարհական, մասնակցել են սույն հանդիպմանը:

Հայ եկեղեցու կողմից խորհրդակցությանը, որպես դիտորդ, իր մասնակցությունն է բերել հանուն Մայր Աթոռ ս. Էջմիածնի, տ. Մեսրոպ ծ. վրդ. Գրիգորյանը (1977 թ. ապրիլի 20—23-ը Ռումինիայի Ցաշ քաղաքում, «Եվրոպական եկեղեցիների կոնֆերանս»-ի նախագահության և խորհրդատու հանձնաժողովի խառն հանդիպումը հաստատեց հայ եկեղեցու անդամակցությունը վերոհիշյալ կոնֆերանսին):

Խորհրդակցությունը բաց է արել «Եվրոպական եկեղեցիների կոնֆերանս»-ի գլխավոր քարտուղար դոկտ. Գլեն Գարֆիլդ Վիլյամսը: Այնուհետև գլխավոր թեմայի շուրջ առանձին զեկուցումներով հանդես են եկել ԵՀԽ-ի Ժնևի կենտրոնի պաշտոնատարներից ուրուգվայցի դոկտ. Յուլիո դե Սանտա Անան, ՍՄՀՄ գիտությունների ակադեմիայի անդամ դոկտ. Ա. Կուցենկովը և նորվեգացի պրոֆ. Քենդ Սքենդսբերգը: Կարդացված զեկուցումների շուրջ տեղի է ունեցել մտքերի աշխույժ փոխանակություն: Խորհրդակցության մասնակիցներն այնուհետև բաժանվել են աշխատանքային երեք խմբերի և ուսումնասիրել Եվրոպան և Երկրորդ աշխարհը շաղկապող և հետաքրքրող այժմեական մի շարք հարցեր:

Առաջին խմբի ուսումնասիրության թեման է եղել՝ «Արդարության առաջնությունը գիտական, տեխնիկական և մշակութային տեսակետներից»: Այս խմբի աշխատանքներին իր գործոն մասնակցությունն է բերել Մայր Աթոռի ներկայացուցիչը:

Երկրորդ խմբում քննարկվել է «Սպառազինությունների մրցավազքը և զինաթափումը» հարցը:

Երրորդ խմբի աշխատանքներն ընթացել են «Տնտեսական արդարությունը, էներ-

գիպի պահանջը և ատոմական ուժի պատասխանատու գործածությունը» թեմայի շուրջ:

Այնուհետև լիազումար մի նիստի ընթացքում մանրամասնորեն քննության են առնվել վերոհիշյալ աշխատանքային երեք խմբերի պատրաստած տեղեկագրերը և կատարվել համապատասխան լրացումներ: Տեղեկագրերում ամփոփվել են ընդհանուր աշխարհում տնտեսության զարգացման, սոցիալ-քաղաքական արդար կարգերի հաստատման և խաղաղության ամրապնդման համար օգտակար տեսություններ և թելադրություններ: Սույն փաստաթղթերի հիման վրա վերջում ժողովականները հանձնարարություններ են ստաջադրել աշխարհի կառավարություններին ու նրանց ղեկավարներին, ինչպես նաև եկեղեցիների առաջնորդներին, որպեսզի՝

ա) Հարգեն մարդկանց ազատությունն ու իրավունքները՝ համաձայն Հելսինկիի եզրափակիչ ակտի հասկացողությանց:

բ) Պաշտպանեն ցեղային, մշակութային, կրոնական և այլ փոքրամասնությանց (ներառյալ գաղթական աշխատավորների) իրավունքները:

գ) Միջազգային մի համաձայնագրով հրաժարվեն ատոմական ուժերի կիրա-

րությունից և դադարեցնեն անմարդկային զենքերի գործածությունը:

դ) Մեծ զգուշություն ցուցաբերեն ատոմական ուժի «խաղաղ գործածության» ծրագրերի մշակման գործում:

ե) Արդյունաբերությանը զարգացած եվրոպական երկրներում եկեղեցիները հանդես գան էներգիայի անպատասխանատու վատնումի դեմ և համայնքների մեջ զարկ տան էներգիայի խնայողական գործածության մտայնությանն ու սովորությանը:

զ) Եկեղեցիները և համայնքները աղոթք ու պաշտամունք մատուցեն Հելսինկիի շախմակությունը հանդիսացող Բեզբրադի խորհրդածողովի հաջողության համար:

Մարտի 11-ին, ուրբաթ օրը, Գալնոյկի խենի ավետարանական եկեղեցում տեղի է ունեցել Էկումենիկ ժամերգություն: Զանազան եկեղեցիների ներկայացուցիչներ կարճ մատչանք-աղոթքներ են կարդացել: Տ. Մեսրոպ ծ. վրդ. Գրիգորյանը երգել է «Ուրախ լեր, սուրբ եկեղեցի» շարականը, խոսել Աթանաս Աղեքսանդրացի մեծ աստվածաբանի ու Նիկիայի ժողովի հաջողության մեջ նրա ունեցած դերի մասին և ապա հրավիրել է պաշտամունքի մասնակիցներին, որպեսզի համատեղ արտասանեն նիկիական հավատո հանգանակը:

